



KENYATAAN MEDIA
SITUASI TERKINI JANGKITAN COVID-19
DI NEGARA BRUNEI DARUSSALAM
30 Mac 2020

1. Pada hari ini, 05 Syaaban 1441 bersamaan 30 Mac 2020, Kementerian Kesihatan ingin memaklumkan mengenai **1 kes baru** yang telah disahkan COVID-19 di negara ini. Ini bermakna **jumlah keseluruhan kes di negara ini ialah 127 orang**.
 - Kes 127 berumur 3 tahun adalah anak kepada Kes 120. Kanak-kanak ini tidak mempunyai sejarah perjalanan ke luar negara dan telah mula mengalami demam panas pada 21 Mac 2020.
2. Kementerian Kesihatan juga ingin memaklumkan kepada orang ramai bahawa Alhamdulillah dengan izin Allah Subhanahu Wa Ta'ala jua, pada hari ini **4 lagi kes** yang dirawat di Pusat Pengasingan Kebangsaan telah disahkan sembuh dan dibenarkan untuk pulang ke rumah, membawa **jumlah keseluruhan yang telah sembuh kepada 38 orang**. Ini bermakna terdapat 88 kes yang sedang dirawat di Pusat berkenaan. Walau bagaimanapun, pada hari ini, seorang lagi pesakit yang sebelum ini dalam pemantauan rapi kini berada dalam keadaan kritikal. Ini membawa jumlah kes berada dalam keadaan kritikal dan memerlukan bantuan mesin pernafasan di Unit Rawatan Intensif di Pusat tersebut

kepada 3 orang. Manakala, seorang lagi masih di dalam pemantauan rapi dan selebihnya dalam keadaan yang baik.

3. Kementerian Kesihatan ingin memaklumkan kepada orang ramai bahawa 4 daripada 9 orang jemaah tabligh yang berada di Kuala Lumpur telah pulang ke tanah air pada 29 Mac 2020. Keempat-empat mereka ini telah disahkan positif COVID-19 semasa berada di Kuala Lumpur dan telah mendapat rawatan di hospital-hospital di Kuala Lumpur. Kementerian Kesihatan Negara Brunei Darussalam akan meneruskan pemantauan kesihatan terhadap mereka untuk memastikan mereka akan terus dalam keadaan yang baik, berpandukan penilaian risiko masing-masing.
4. Sementara itu, pada masa ini, seramai 829 orang sedang menjalani kurantin, menurut Akta Penyakit Berjangkit Penggal 204. Manakala seramai 1,389 orang lagi telah menamatkan tempoh kurantin dan dalam keadaan yang baik. Sejak awal Januari 2020, sebanyak 5,980 ujian makmal bagi COVID-19 telah dijalankan.
5. Setakat ini, 531 orang telah mendaftar untuk menjalani pengasingan diri mandatori di rumah masing-masing selepas tiba di negara ini setelah membuat perjalanan antarabangsa, yang mana seramai kira-kira 346 daripadanya adalah penuntut. Sebahagian besar daripada mereka telah menghadirkan diri untuk menjalani ujian makmal bagi COVID-19. Sekali lagi ditekankan, sesiapa yang belum menjalani ujian makmal tersebut adalah dinasihatkan untuk menghadirkan diri ke Kompleks Sukan, Hospital Raja Isteri Pengiran Anak Saleha dengan segera.

6. Dalam pada itu, Kementerian Kesihatan juga masih giat melaksanakan ujian makmal bagi COVID-19 terhadap mereka yang sedang menjalani pengasingan diri mandatori di kemudahan-kemudahan yang disediakan oleh pihak Kerajaan. Setakat ini, daripada sejumlah 1425 orang yang berdaftar di kemudahan-kemudahan tersebut, seramai 1051 orang (kira-kira 72%) telah menjalani ujian makmal. Sesiapa yang didapati positif bagi COVID-19 telah dibawa untuk rawatan ke Pusat Pengasingan Kebangsaan.
7. Sementara itu, Kementerian Kesihatan juga ingin meminta kerjasama kepada sesiapa yang telah menjalani ujian makmal untuk memastikan nombor telefon bimbit yang diberikan kepada petugas-petugas adalah betul dan boleh menerima pesanan ringkas SMS. Ini adalah kerana pihak Kementerian Kesihatan akan mengirimitkan keputusan ujian makmal melalui pesanan ringkas SMS sebaik saja keputusan tersebut diperolehi. Inisiatif ini baru bermula pada 28 Mac 2020 dan masih melalui fasa percubaan. Oleh yang demikian, berkemungkinan terdapat sedikit kelambatan dalam pengirimitan pesanan-pesanan ringkas SMS tersebut. Dalam pada itu, sesiapa yang telah menerima panggilan telefon dari Kementerian Kesihatan bagi keputusan ujian makmal masing-masing tidak akan lagi menerima keputusan melalui pesanan ringkas SMS.
8. Mengenai dengan mesej yang tular berkenaan pencarian kontek bagi salah seorang kes yang telah disahkan positif COVID-19, Kementerian Kesihatan ingin memaklumkan kepada orang ramai bahawa kes tersebut

telah dimasukkan ke Pusat Pengasingan Kebangsaan untuk rawatan sejak 28 Mac 2020 dan telah kekal berada di Pusat tersebut sejak tarikh berkenaan. Walau bagaimanapun, untuk membantu penyiasatan lanjut mengenai kes ini, Kementerian Kesihatan ingin meminta sesiapa yang ada mempunyai kontak bersama dengan kes tersebut di antara 10 hingga 15 Mac 2020 untuk menghubungi talian 2380665 atau 8163065 (semasa waktu pejabat sahaja). Dalam pada itu, kerjasama dan timbang rasa orang ramai adalah juga dipohonkan untuk menghentikan penularan mesej berkenaan demi untuk menjaga *privacy* kes berkenaan.

9. Untuk makluman orang ramai, Kementerian Kesihatan sukacita ingin mengongsikan bahawa, Alhamdulillah pembinaan makmal virologi tambahan yang terletak di Jalan Sumbiling, Bandar Seri Begawan telah selesai dibina dan InshaaAllah akan mula beroperasi pada 01 April 2020. Projek pembinaan antara Kementerian Pembangunan dengan Kementerian Kesihatan tersebut telah bermula pada 17 Mac 2020 dan adalah projek yang dikendalikan oleh sebuah syarikat kontraktor tempatan iaitu LSL Sdn Bhd dengan kerjasama Beijing Genomic Institution (BGI). Dengan adanya makmal virologi tambahan ini InshaaAllah akan dapat menambahkan kapasiti dan mempercepatkan proses ujian makmal bagi COVID-19 di negara ini.
10. Untuk maklumat lanjut dan perkembangan terkini, orang ramai boleh melayari laman web Kementerian Kesihatan iaitu **www.moh.gov.bn** atau menghubungi **Talian Nasihat Kesihatan 148** (pada bila-bila masa) atau melalui aplikasi **healthinfo.gov.bn**.

- TAMAT -

Rujukan : KK/PR/2

Tarikh : 05 Syaaban 1441H / 30 Mac 2020